

Bondia,

Ha'u-nia respetus ba:

- Ministra Saúde – Sua Exelénsia Doutora Odete Belo
- Diretora Jerál - Doutora Odete da Silva Viegas
- Diretór ba Polítika Saúde – Señor Narciso Fernandes
- Diretór ba Jestaun Kazu – Doutór Nilton do Carmo da Silva
- Diretór Misaun USAID iha Timor-Leste Señor Jim Wright

Ha'u kontente hamutuk ho Ministériu Saúde ohin hodi entrega Monitór Sinais Vitais hamutuk 10 oferese husi Estados Unidos Amérika.

Monitór Sinais Vitais 10 ne'e sei mellora kapasidade husi profisionál saúde Timoroan sira hodi diagnostika no trata paciente sira . Ekipamentu hirak ne'e sei permite atu profisionál saúde sira koko temperatura, presaun arteriál, saturasaun oxijéniu no sinál vitál esensiál sira seluk iha paciente sira ho tipu moras hotu-hotu.

Ministériu Saúde, governu, no povu Timor-Leste evita ona ho susesu propagasaun COVID-19 iha Timor-Leste.

Timor-Leste nia profisionál saúde no primeiru sokorista sira barak ne'ebé dedikadu tebes merese hetan ita-nia apresiasaun espesiál. Feto no mane Timoroan sira serbisu loro-loron lahatene kole hodi prevene propagasaun COVID-19 no moras sira seluk. Ami hakarak atu sira hatene katak Estados Unidos Amérika hamriik-firme hamutuk ho sira.

Monitór hirak ne'e nu'udar ezemplu ida husi Estados Unidos Amérika nia apoiu.

Projetu ida-ne'e parte ida husi \$2.6 miliaun ne'ebé Estados Unidos Amérika oferese ona too agora hodi apoia Timor-Leste nia luta-hasoru COVID-19. Montante ne'e aumenta beibeik kuaze loro-loron.

Ami fornese ona iha inísio osan \$1.1 miliaun, depois tuirmai \$500,000 ba UNICEF. No ami finansia projetus oin-oin agora no iha futuro maka hanesan estasaun fase liman sira, máskaras ba labarik estudante sira no jeradór ida ba Sentru Saúde Vera Cruz.

Defaktu, Estados Unidos apoia ona Timor-Leste nia setór saúde dezde independénsia, fornese ona osan liu \$700 miliaun hodi hametin sistema saúde no asesu prestasaun saúde ba povu Timor-Leste.

Enkuantu Amerikanu sira loro-loron luta-hasoru vírus perigozu ida-ne'e, ami mós halo buat-hotu ami bele hodi prevene propagasaun COVID-19 no mellora kuidadu saúde iha nasaun sira iha mundu tomak.

Estados Unidos América kontinua sai hanesan kontribuinte boot liu ba organizasaun multilaterál sira ne'ebé luta-hasoru COVID-19, no organizasaun sira ne'e mós ativu iha Timor-Leste.

Hanesan Timor-Leste nia líder sira dehan ona, agora lá'os tempu atu hatuun itania guarda. Vírus ida-ne'e sei propaga hela iha mundu no COVID-19 aumenta beibeik iha nasaun barak, inklui iha Indonézia.

Ita hotu-hotu presiza kontinua pratika ijiene di'ak, distansiamentu fíziku no uza máskaras bainhira hakbesik ba ema seluk. Asaun simples hirak ne'e provadu ona hamenus propagasaun COVID-19.

Ikus liu, ha'u hakarak aplaude governu no povu Timor-Leste nia servisu hasoru emerjénsia saúde públika ida-ne'e.

Estados Unidos América kontinua hanesan parseiru firme ba Timor-Leste iha nia esforsu sira luta-hasoru COVID-19. Ami kompartilla Timor-Leste nia objetivu sira iha ninia jornada ba auto-sufisiénsia.